

塗毒鼓 全

67
371



始



大正五年十一月刊

塗毒鼓


全

藤田家藏版

67-371



瓦廠



子門

大正
6. 9. 14
内交

淵默齋題



塗毒鼓標目

興禪大燈國師遺誠

禪宗無門關

無邊風月頌

雪竇百則頌古

葛藤集

無相心地戒

五位編正口訣

臨濟錄

虛堂錄代別

槐安國語

興禪大燈國師遺誠

汝等諸人來此山中爲道聚頭莫爲衣食有肩無不
著有口無不食只須十二時中向無理會處究來究
去光陰如箭謹莫雜用心看取看取老僧行脚後或
寺門繁興佛閣經卷縷金銀多衆鬧熱或誦經諷呪
長坐不臥一食卯齋六時行道直饒雖恁麼去不以
佛祖不傳妙道掛在胸間忽撥無因果眞風墜地皆
是邪魔種族也老僧去世久矣不許稱兒孫或儻有
一人綿絕野外一把芽底折脚鐺內煮野菜根喫過

興禪大燈國師遺誡
日專一究明已事底、與老僧日日相見報恩底人也、
誰敢輕忽、勉旃勉旃、

興禪大燈國師遺誡終

說道無門、盡大地人得入、說道有門、無阿
師、分第一、強添幾箇、注脚、大似笠上頂笠、
硬要習翁、贊揚、又是乾竹、絞汁、著得這些、
哮本、不消習翁、一擲、一擲、莫教一滴、落江
湖、千里、烏雕、追不得、
紹定改元七月晦、習菴陳墳寫

無門關
紹定二年正月初五日恭遇
天基聖節臣僧慧開預於元年十二月初五日印行
拈提佛祖機緣四十八則祝延
今上皇帝聖躬萬歲萬歲萬萬歲
皇帝陛下恭願
聖明齊日月
叡算等乾坤八方歌
有道之
君四海樂無爲之化

慈懿皇后功德報因佑慈禪寺前住持傳法臣僧慧開謹言

無門關
禪宗無門關

佛語心爲宗無門爲法門既是無門且作麼生透豈
不見道從門入者不是家珍從緣得者始終成壞恁
麼說話大似無風起浪好肉剗瘡何況滯言句覓解
會掉棒打月隔靴爬痒有甚交涉慧開紹定戊子夏
首衆于東嘉龍翔因衲子請益遂將古人公案作敲
門瓦子隨機引導學者竟爾抄錄不覺成集初不以
前後叙列共成四十八則通曰無門關若是箇漢不
顧危亡單刀直入八臂那吒攔他不住縱使西天四
七東土二三只得望風乞命設或躊躇也似隔窓看

馬騎^チ得^ク眼^シ來^ハ早^ク已^ニ蹉^セ過^シ

頌曰

大道無門 千差有路 透得此關 乾坤獨步

佛祖機緣四十八則目錄

- | | | |
|---------|---------|---------|
| 一、趙州狗子 | 二、百丈野狐 | 三、俱胝豎指 |
| 四、胡子無鬚 | 五、香嚴上樹 | 六、世尊拈花 |
| 七、趙州洗鉢 | 八、奚仲造車 | 九、大通智勝 |
| 一〇、清稅孤貧 | 一一、州勘庵主 | 一二、巖喚主人 |
| 一三、德山托鉢 | 一四、南泉斬猫 | 一五、洞山三頓 |
| 一六、鐘聲七條 | 一七、國師三喚 | 一八、洞山三斤 |
| 一九、平常是道 | 二〇、大力量人 | 二一、雲門屎橛 |
| 二二、迦葉刹竿 | 二三、不思善惡 | 二四、離却語言 |
| 二五、三座說法 | 二六、二僧卷簾 | 二七、不是心佛 |

二八、久響龍潭	二九、非風非幡	三〇、卽心卽佛
三一、趙州勘婆	三二、外道問佛	三三、非心非佛
三四、智不是道	三五、倩女離魂	三六、路逢達道
三七、庭前栢樹	三八、牛過窓櫺	三九、雲門話墮
四〇、趨倒淨瓶	四一、達磨安心	四二、女子出定
四三、首山竹篋	四四、芭蕉拄杖	四五、他是阿誰
四六、竿頭進步	四七、兜率三關	四八、乾峰一路

目錄終

無門關

參學比丘 彌衍 宗紹編

(一) 趙州狗子

趙州和尚因僧問狗子還有佛性也無州云無
 無門曰參禪須透祖師關妙悟要窮心路絕祖關
 不透心路不絕盡是依草附木精靈且道如何是
 祖師關只者一箇無字乃宗門一關也遂目之曰
 禪宗無門關透得過者非但親見趙州便可與歷
 代祖師把手共行眉毛厮結同一眼見同一耳聞
 豈不慶快莫有要透關底麼將三百六十骨節八

萬四千毫竅通身起箇疑團參箇無字晝夜提撕
莫作虛無會莫作有無會如吞了箇熱鐵丸相似
吐又吐不出蕩盡從前惡知惡覺久久純熟自然
內外打成一片如啞子得夢只許自知驀然打發
驚天動地如奪得關將軍太刀入手逢佛殺佛逢
祖殺祖於生死岸頭得大自在向六道四生中遊
戲三昧且作麼生提撕盡平生氣力學箇無字若
不間斷好似法燭一點便著

頌曰

狗子佛性

全提正令

纔涉有無

喪身失命

(二) 百丈野狐

百丈和尚凡參次有一老人常隨衆聽法衆人退老
人亦退忽一日不退師遂問面前立者復是何人老
人云諾某甲非人也於過去迦葉佛時曾住此山因
學人問大修行底人還落因果也無某甲對云不落
因果五百生墮野狐身今請和尚代一轉語貴脫野
狐遂問大修行底人還落因果也無師云不昧因果
老人於言下大悟作禮云某甲已脫野狐身住在山
後敢告和尚乞依亡僧事例師令維那白槌告衆食
後送亡僧大衆言議一衆皆安涅槃堂又無人病何

故如是食後只見師領衆至山後崑下以杖挑出一
死野狐乃依火葬師至晚上堂舉前因緣黃檗便問
古人錯祇對一轉語墮五百生野狐身轉轉不錯合
作箇甚麼師云近前來與伊道黃檗遂近前與師一
掌師拍手笑云將謂胡鬚赤更有赤鬚胡

無門曰不落因果爲甚墮野狐不味因果爲甚脫
野狐若向者裏著得一隻眼便知得前百丈贏得
風流五百生

頌曰

不落不味 兩采二賽 不味不落 千錯萬錯

(三) 俱胝豎指

俱胝和尚凡有詰問唯舉一指後有童子因外人問
和尚說何法要童子亦豎指頭胝聞遂以刀斷其指
童子負痛號哭而去胝復召之童子廻首胝却豎起
指童子忽然領悟胝將順世謂衆曰吾得天龍一指
頭禪一生受用不盡言乾示滅

無門曰俱胝并童子悟處不在指頭上若向者裏
見得天龍同俱胝并童子與自己一串穿却

頌曰

俱胝鈍置老天龍 利刃單提勘小童

巨靈擡手無多子 分破華山千萬重

(四) 胡子無鬚

或庵曰西天胡子因甚無鬚

無門曰參須實參悟須實悟者箇胡子直須親見
一回始得說親見早成兩箇

頌曰

癡人面前不可說夢 胡子無鬚 惺惺添槽

(五) 香嚴上樹

香嚴和尚云如人上樹口啣樹枝手不攀枝脚不踏
樹樹下有人問西來意不對即違他所問若對又喪

身失命正恁麼時作麼生對

無門曰縱有懸河之辯惣用不著說得一大藏教
亦用不著若向者裏對得著活却從前死路頭死
却從前活路頭其或未然直待當來問彌勒

頌曰

香嚴真杜撰 惡毒無盡限

啞却衲僧口 通身迸鬼眼

(六) 世尊拈花

世尊昔在靈山會上拈花示衆是時衆皆默然惟迦
葉尊者破顏微笑世尊云吾有正法眼藏涅槃妙心

實相無相微妙，法門不立文字教外別傳付囑摩訶
迦葉。

無門曰黃面瞿曇倘若無人壓良爲賤懸羊頭賣
狗肉將謂多少奇特只如當時大衆都笑正法眼
藏作麼生傳設使迦葉不笑正法眼藏又作麼生
傳若道正法眼藏有傳授黃面老子誑講閻闍若
道無傳授爲甚麼獨許迦葉。

頌曰

拈起花來 尾巴已露 迦葉破顏 人天罔措

(七) 趙州洗鉢

趙州因僧問某甲乍入叢林乞師指示州云喫粥了
也未僧云喫粥了也州云洗鉢盂去其僧有省
無門曰趙州開口見膽露出心肝者僧聽事不眞
喚鐘作甕

頌曰

只爲分明極 翻令所得遲
早知燈是火 飯熟已多時

(八) 奚仲造車

月庵和尚問僧奚仲造車一百幅拈却兩頭去却軸
明甚麼邊事。

無門曰若也直下明得眼似流星機如掣電

頌曰

機輪轉處 達者猶迷 四維上下 南北東西

(九) 大通智勝

興陽讓和尚因僧問大通智勝佛十劫坐道場佛法不現前不得成佛道時如何讓曰其問甚諦當僧云既是坐道場爲甚麼不得成佛道讓曰爲伊不成佛無門曰只許老胡知不許老胡會凡夫若知卽是聖人聖人若會卽是凡夫

頌曰

了身何似了心休 了得心兮身不愁
若也身心俱了了 神仙何必更封侯

(一〇) 清稅孤貧

曹山和尚因僧問云清稅孤貧乞師賑濟山云稅關梨稅應諾山曰青原白家酒三盞喫了猶道未沾唇無門曰清稅輪機是何心行曹山具眼深辨來機然雖如是且道那裏是稅關梨喫酒處

頌曰

貧似范丹 氣如項羽 活計雖無 敢與鬪富
(一一) 州勘庵主

趙州到一庵主處問有麼有麼主豎起拳頭州云水淺不是泊艇處便行又到一庵主處云有麼有麼主亦豎起拳頭州云能縱能奪能殺能活便作禮

無門曰一般豎起拳頭為甚麼肯一箇不肯一箇且道請訛在甚處若向者裏下得一轉語便見趙州舌頭無骨扶起放倒得大自在雖然如是爭奈趙州却被一庵主勘破若道二庵主有優劣未具參學眼若道無優劣亦未具參學眼

頌曰

眼流星 機掣電 殺人刀 活人劍

(一一) 巖喚主人

瑞巖彥和尚每日自喚主人公復自應諾乃云惺惺着喏他時異日莫受人瞞喏喏

無門曰瑞巖老子自買自賣弄出許多神頭鬼面何故擊一箇喚底一箇應底一箇惺惺底一箇不受人瞞底認著依前還不是若也做他惚是野狐見解

頌曰

學道之人不識真 只為從前認識神
無量劫來生死本 癡人喚作本來人

(一三) 德山托鉢

德山一日托鉢會元作擊鉢下法堂見雪峰問者老漢鐘未鳴鼓未響托鉢向甚處去山便回方丈峰舉似巖頭頭云大小德山未會末後句山聞令侍者喚巖頭來問曰汝不肯老僧那巖頭密啓其意山乃休去明日陞座果與尋常不同巖頭至僧堂前拊掌大笑云且喜得老漢會末後句他後天下人不奈伊何

頌曰

無門曰若是末後句巖頭德山俱未夢見在檢點將來好似一棚傀儡

識得最初句 便會末後句

末後與最初 不是者一句

(一四) 南泉斬猫

南泉和尚因東西兩堂爭猫兒泉乃提起云大眾道得即救道不得即斬却也衆無對泉遂斬之晚趙州外歸泉舉似州州乃脫履安頭上而出泉云子若在即救得猫兒

無門曰且道趙州頂草鞋意作麼生若向者裏下得一轉語便見南泉令不虛行其或未然險

頌曰

趙州若在，倒行此令，奪却刀子，南泉乞命。

(一五) 洞山三頓

雲門因洞山參次，門問曰：「近離甚處？」山云：「查渡門。」曰：「夏在甚處？」山云：「湖南。」報慈門曰：「幾時離？」山云：「八月二十五日。」放汝三頓棒。山至，明日却上問訊。昨日蒙和尚放三頓棒，不知過在甚處。門曰：「飯袋子，江西湖南便恁麼去山於此大悟。」

無門曰：「雲門當時便與本分草料，使洞山別有生機。一路家門不致寂寥，一夜在是非海裏著到，直待大明再來，又與他注破洞山直下悟去，未是性。」

燥且問諸人：「洞山三頓棒，合喫不合喫？若道合喫，草木叢林皆合喫；棒若道不合喫，雲門又成誑語。向者裏明得，方與洞山出一口氣。」

頌曰

獅子教兒迷子訣，擬前跳躑早翻身。
無端再叙當頭著，前箭猶輕後箭深。

(一六) 鐘聲七條

雲門曰：「世界恁麼廣闊，因甚向鐘聲裏披七條？」
無門曰：「大凡參禪學道，切忌隨聲逐色。縱使聞聲悟道，見色明心，也是尋常殊不知衲僧家騎聲蓋。」

色頭々上明着々上妙然雖如是且道聲來耳畔
耳往聲邊直饒響寂双忘到此如何話會若將耳
聽應難會眼處聞聲方始親

頌曰

會則事同一家 不會萬別千差
不會事同一家 會則萬別千差

(一七) 國師三喚

國師三喚侍者侍者三應國師云將謂吾辜負汝元
來却是汝辜負吾

無門曰國師三喚舌頭墮地侍者三應和光吐出

國師年老心孤按牛頭喫草侍者未肯承當美食
不中飽人食且道那裏是他辜負處國淨才子貴
家富小兒嬌

頌曰

鐵枷無孔要人擔 累及兒孫不等閑
欲得撐門并拄戶 更須赤脚上刀山

(一八) 洞山三斤

洞山和尚因僧問如何是佛山云麻三斤
無門曰洞山老人參得些蚌蛤禪纔開兩片露出
肝腸然雖如是且道向甚處見洞山

頌曰

突出麻三斤 言親意更親
來說是非者 便是々非人

(一九) 平常是道

南泉因趙州問如何是道泉云平常心是道州云還
可趣向否泉云擬向即乖州云不擬爭知是道泉云
道不屬知不屬不知々是妄覺不知是無記若真達
不疑之道猶如太虛廓然洞豁豈可強是非也州於
言下頓悟

無門曰南泉被趙州發問直得瓦解冰消分疎不

下趙州縱饒悟去更參三十年始得

頌曰

春有百花秋有月 夏有涼風冬有雪
若無閑事挂心頭 便是人間好時節

(二〇) 大力量人

松源和尚云大力量人因甚擡脚不起又云開口不
在舌頭上

無門曰松源可謂傾腸倒腹只是欠人承當縱饒
直下承當正好來無門處喫痛棒何故要識真
金火裏看

頌曰

擡脚踏翻香水海
低頭俯視四禪天
一箇渾身無處著
請續一句

(一一) 雲門屎橛

雲門因僧問如何是佛門云乾屎橛

無門曰雲門可謂家貧難辦素餐事忙不及草書
動便將屎橛來撐門拄戶佛法興衰可見

頌曰

閃電光 擊石火 眨得眼 已蹉過

(一二) 迦葉刹竿

迦葉因阿難問云世尊傳金襴袈裟外別傳何物葉
喚云阿難々應諾葉云倒却門前刹竿著
無門曰若向者裏下一轉語親切便見靈山一
會儼然未散其或未然毘婆尸佛早留心直至而今
不得妙

頌曰

問處何如答處親
幾人於此眼生筋
兄呼弟應揚家醜
不屬陰陽別是春

(一三) 不思善惡

六祖因明上座趨至大庾嶺祖見明至即擲衣鉢於

石上云此衣表信可力爭耶任君將去明遂舉之如山不動踟躕悚慄明日我來求法非爲衣也願行者開示祖云不思善不思惡正與麼時那箇是明上座本來面目明當下大悟遍體汗流泣淚作禮問曰上來密語密意外還更有意旨否祖曰我今爲汝說者卽非密也汝若返照自己面目密却在汝邊明云某甲雖在黃梅隨衆實未省自己面目今蒙指授入處如人飲水冷暖自知今行者卽是某甲師也祖云汝若如是則吾與汝同師黃梅善自護持

無門曰六祖可謂是事出急家老婆心切譬如新

荔支剝了殼去了核送在你口裏只要你嚙一嚙

頌曰

描不成兮畫不就 贊不及兮休生受

本來面目沒處藏 世界壞時渠不朽

(二四) 離却語言

風穴和尚因僧問語默涉離微如何通不犯穴云長憶江南三月裏鷓鴣啼處百花香

無門曰風穴機如掣電得路便行爭奈坐前人舌頭不斷若向者裏見得親切自有出身之路且離却語言三味道將一句來

頌曰

不露風骨句，未語先分付。
進步口喃々，知君大罔措。

(二五) 三座說法

仰山和尚夢見往彌勒所安第三座有一尊者白槌，
云今日當第三座說法山乃起白槌云摩訶衍法離
四句絕百非諦聽々々
無門曰且道是說法不說法開口即失閉口又喪
不開不閉十萬八千

頌曰

白日青天 夢中說夢 捏恠捏恠 誑誑一衆

(二六) 二僧卷簾

清涼大法眼因僧齋前上參眼以手指簾時有二僧
同去卷簾眼曰一得一失

無門曰且道是誰得誰失若向者裏着得一隻眼便
知清涼國師敗闕處然雖如是切忌向得失裏商量

頌曰

卷起明々徹太空 太空猶未合吾宗
爭似從空都放下 綿々密々不通風

(二七) 不是心佛

南泉和尚因僧問云還有不與人說底法麼泉云有僧云如何是不與人說底法泉云不是心不是佛不是物

無門曰南泉被者一問直得揣盡家私郎當不少

頌曰

叮嚀損君德無言真有功

任從滄海變終不爲君通

(二八) 久響龍潭

龍潭因德山請益抵夜潭云夜深子何不下去山遂珍重揭簾而出見外面黑却回云外面黑潭乃點紙

燭度與山擬接潭便吹滅山於此忽然有省便作禮潭云子見箇甚麼道理山云某甲從今日去不疑天下老和尚舌頭也至明日龍潭陞堂云可中有箇漢牙如劍樹口似血盆一棒打不回頭他時異日向孤峯頂上立君道在山遂取疏抄於法堂前將一炬火提起云窮諸玄辨若一毫致於太虛竭世樞機似一滴投於巨壑將疏抄便燒於是禮辭

無曰德山末出關時心憤々口悱々得々來南方要滅却教外別傳之旨及到澧州路上問婆子買點婆云大德車子內是甚麼文字山云金剛

經抄疏婆云只如經中道過去心不可得見在心
不可得未來心不可得大德要點那箇心德山被
者一問直得口似匾檐然雖如是未肯向婆子句
下死却遂問婆子近處有甚麼宗師婆云五里外
有龍潭和尚及到龍潭納盡敗闕可謂是前言不
應後語龍潭大似憐兒不覺醜見他有些子火種
郎忙將惡水驚頭一澆々殺冷地看來一場好笑

頌曰

聞名不如見面 見面不如聞名
雖然救得鼻孔 爭奈瞎却眼睛

(二九) 非風非幡

六祖因風颺刹幡有二僧對論一云幡動一云風動
往復曾未契理祖云不是風動不是幡動仁者心動
二僧悚然

無門曰不是風動不是幡動不是心動甚處見祖
師若向者裏見得親切方知二僧買鐵得金祖師
忍俊不禁一場漏逗

頌曰

風幡心動 一狀領過 只知開口 不覺話墮

(三〇) 卽心卽佛

馬祖因大梅問如何是佛祖云卽心是佛

無門曰若能直下領略得去著佛衣喫佛飯說佛話行佛行卽是佛也然雖如是大梅引多少人錯認定盤星爭知道說箇佛字三日漱口若是箇漢見說卽心是佛掩耳便走

頌曰

青天白日 切忌尋覓 更問如何 抱賊叫屈

(三一) 趙州勘婆

趙州因僧問婆子臺山路向甚處去婆云驀直去僧纔行三五步婆云好箇師僧又恁麼去後有僧舉似

州々云待我去與你勘過這婆子明日便去亦如是問婆亦如是答州歸謂衆曰臺山婆子我與爾勘破了也

無門曰婆子只解坐籌帷幄要且著賊不知趙州老人善用偷營劫寨之機又且無大人相檢點將來二俱有過且道那裏是趙州勘破婆子處

頌曰

問既一般 答亦相似 飯裏有砂 泥中有刺

(三二) 外道問佛

世尊因外道問不問有言不問無言世尊據座外道

贊歎云世尊大慈大悲開我迷雲令我得入乃具禮而去阿難尋問佛外道有何所證贊歎而去世尊云如世良馬見鞭影而行

無門曰阿難乃佛弟子宛不如外道見解且道外道與佛弟子相去多少

頌曰

劍刃上行 水稜上走 不涉階梯 懸崖撒手

(三三) 非心非佛

馬祖因僧問如何是佛祖曰非心非佛無門曰若向者裏見得參學事畢

頌曰

路逢劍客須呈 不遇詩人莫獻
逢人且說三分 未可全施一片

(三四) 智不是道

南泉云心不是佛智不是道

無門曰南泉可謂老不識羞纔開臭口家醜外揚然雖如是知恩者少

頌曰

天晴日頭出 雨下地上濕
盡情都說了 只恐信不及

(三五) 倩女離魂

五祖問僧云倩女離魂那箇是真底
無門曰若向者裏悟得真底便知出殼入殼如宿
旅舍其或未然切莫亂走驀然地水火風一散如
落湯螃蟹七手八脚那時莫言不道

頌曰

雲月是同 溪山各異 萬福々々 是一是二

(三六) 路逢達道

五祖曰路逢達道人 不將語默對且道將甚麼對
無門曰若向者裏對得親切不妨慶快其或未然

也須一切處著眼

頌曰

路逢達道人 不將語默對
攔腮劈面拳 直下會便會

(三七) 庭前栢樹

趙州因僧問如何是祖師西來意州云庭前栢樹子
無門曰若向趙州答處見得親切前無釋迦後無
彌勒

頌曰

言無展事 語不投機 承言者喪 滯句者迷

(三八) 牛過窓櫺

五祖曰譬如水牯牛過窓櫺頭角四蹄都過了因甚麼尾巴過不得

無門曰若向者裏顛倒著得一隻眼下得一轉語可以上報四恩下資三有其或未更須照顧尾巴始得

頌曰

過去墮坑塹 回來却被壞
者些尾巴子 直是甚奇怪

(三九) 雲門話墮

雲門因僧問光明寂照遍河沙一句未絕門遽曰豈不是張拙秀才語僧云是門云話墮也後來死心拈云且道那裏是者僧話墮處

無門曰若向者裏見得雲門用處孤危者僧因甚話墮堪與人天為師若也未明自救不了

頌曰

急流垂釣 貪餌者著
口縫纔開 性命喪却

(四〇) 趨倒淨瓶

鴻山和尚始在百丈會中充典座百丈將選大鴻主人乃請同首座對衆下語出格者可往百丈遂拈淨

瓶置地上設問云不得喚作淨瓶汝喚作甚麼首座
乃云不可喚作木楔也百丈却問於山々乃趨倒淨
瓶而去百丈笑云第一座輸却山子也因命之爲開
山

無門曰滂山一期之勇爭奈跳百丈圈圍又出檢
點將來便重不便輕何故聲脫得盤頭擔起鐵枷

頌曰

颺下筰籬并木杓 當陽一突絕周遮
百丈重關攔不住 脚尖趯出佛如麻

(四一) 達磨安心

達磨面壁二祖立雪斷臂云弟子心未安乞師安心
磨云將心來爲汝安祖云覓心了不可得磨云爲汝
安心竟

無門曰缺齒老胡十萬里航海特特而來可謂是
無風起浪末後接得一箇門人又却六根不具噴
謝三郎不識四字

頌曰

西來直指 事因囑起 撓聒叢林 元來是你

(四二) 女子出定

世尊昔因文殊至諸佛集處值諸佛各還本處惟有

一女人近彼佛坐入於三昧文殊乃白佛云何女人
得近佛坐而我不得佛告文殊汝但覺此女令從三
昧起汝自問之文殊遶女人三匝鳴指一下乃托至
梵天盡其神力而不能出世尊云假使百千文殊亦
出此女人定不得下方過一十二億河沙國土有罔
明菩薩能出此女人定須與罔明大士從地湧出禮
拜世尊世尊勅罔明却至女人前鳴指一下女人於
是從定而出

無門曰釋迦老子做者一場雜劇不通小女且道
文殊是七佛之師因甚出女人定不得罔明初地

菩薩爲甚却出得若向者裏見得親切業識忙々
那伽大定

頌曰

出得出不得 渠儂得自由

神頭并鬼面 敗闕當風流

(四三) 首山竹筴

首山和尚拈竹筴示衆云汝等諸人若喚作竹筴則
觸不喚作竹筴則背汝諸人且道喚作甚麼

無門曰喚作竹筴則觸不喚作竹筴則背不得有
語不得無語速道速道

無門曰進得步翻得身更嫌何處不稱尊然雖如是且道百尺竿頭如何進步

頌曰

瞎却頂門眼 錯認定盤星
拚身能捨命 一盲引衆盲

(四七) 兜率三關

兜率悅和尚設三關問學者
撥草參玄只圖見性即今上人性在甚處 識得自性方脫生死眼光落時作麼生脫 脫得生死便知去處四大分離向甚處去

無門曰若能下得此三轉語便可以隨處作主遇緣即宗其或未然鹿飡易飽細嚼難飢

頌曰

一念普觀無量劫 無量劫事即如今
如今覷破箇一念 覷破如今覷底人

(四八) 乾峯一路

乾峯和尚因僧問十方薄伽梵一路涅槃門未審路頭在甚麼處峯拈起拄杖劃一劃云在者裏後僧請益雲門々拈起扇子云扇子踔跳上三十三天築著帝釋鼻孔東海鯉魚打一棒雨似盆傾

無門曰一人向深々海底行簸土揚塵一人於高々山頂立白浪滔天把定放行各出一隻手扶豎宗乘大似兩箇馳子相撞著世上應無直底人正眼觀來二大老惣未識路頭在

頌曰

未學步時先已到 未動舌時先說了
直饒著々在機先 更須知有向上竅
從上佛祖垂示機緣據歎結案初無剩語揭翻腦
蓋露出眼睛肯要諸人直下承當不從佗覓若是
通方上士纔聞舉著便知落處了無門戶可入亦

無階級可升掉臂度關不問關吏豈不見玄沙道
無門解脫之門無意道人之意又白雲道明々知
道只是者箇爲甚麼透不過恁麼說話也是赤土
擦牛欄若透得無門關早是鈍置無門若透不得
無門關亦乃辜負自己所謂涅槃心易曉差別智
難明明得差別智家國自安寧肯紹定改元解制
前五日楊岐八世孫無門比丘慧開謹識

無門關卷終

無門曰一人向深々海底行簸土揚塵一人於高々山頂立白浪滔天把定放行各出一隻手扶豎宗乘大似兩箇馳子相撞著世上應無直底人正眼觀來二大老惣未識路頭在

頌曰

未舉步時先已到 未動舌時先說了
直饒著々在機先 更須知有向上竅
從上佛祖垂示機緣據款結案初無剩語揭翻腦
蓋露出眼睛肯要諸人直下承當不從佗覓若是
通方上士纔聞舉著便知落處了無門戶可入亦

無階級可升掉臂度關不問關吏豈不見立沙道
無門解脫之門無意道人之意又白雲道明々知
道只是者箇爲甚麼透不過恁麼說話也是赤土
搽牛欄若透得無門關早是鈍置無門若透不得
無門關亦乃辜負自己所謂涅槃心易曉差別智
難明明得差別智家國自安寧肯紹定改元解制
前五日楊岐八世孫無門比丘慧開謹識

無門關卷終

禪箴

循規守矩無繩自縛縱橫無碍外道魔軍存心澄寂
默照邪禪恣意忘緣墮落深坑惺々不味帶鎖擔枷
思善思惡地獄天堂佛見法見二鍊圍山念起即覺
弄精魂漢兀然習定鬼家活計進則迷理退則乖宗
不進不退有氣死人且道如何履踐努力今生須了
却莫教永劫受餘殃

黃龍三關

我手何似佛手摸得枕頭背後不覺大笑呵々元來
通身是手

我脚何似驢脚未舉步時踏著一任四海橫行倒跨
楊岐三脚

人々有箇生緣各々透徹機先那吒折骨還父五祖
豈藉爺緣

佛手驢脚生緣非佛非道非禪莫怪無門關險結盡
衲子深冤

瑞巖近日有無門撥向繩床判古今凡聖路頭俱截
斷幾多蟠蟄起雷音

請無門首座立僧山偈奉謝紹定庚寅季春無
量宗壽書

達磨西來不執文字直指人心見性成佛說箇直指已是迂曲更言成佛郎當不少既是無門因甚有關老婆心切惡聲流布無庵欲贅一語又成四十九則其間些子請訛剔起眉毛薦取淳祐乙巳夏重刊

檢校少保寧武軍節度使京湖安撫制置大使兼屯田大使兼夔路策應大使兼知江陵府漢東郡開國公食邑二千一百戶食實封陸佰戶

孟 拱 跋

無門老禪作四十八則語判斷古德公案大似賣油餅人令買家開口接了更吞吐不得然雖如是安晚欲就渠熱爐熬上再打一枚足成大衍之數却仍前送似未知
老師從何處下牙如一口喫得放光動地若猶未也連見在四十八箇都成熟沙去速道速道

第四十九則語

經云止止不須說我法妙難思安晚曰法從何來妙從何有說時又作麼生豈但豐于饒舌元是釋迦多口這老子造作妖怪令千百代兒孫被葛藤纏倒未

得頭出似這般奇特話靶起挑不上甌蒸不熟有多
少錯認底傍人問云畢竟作如何結斷安晚合十指
爪曰止止不須說我法妙難思却急去難思兩字上
打箇小圓相子指示衆人大藏五千卷維摩不二門
總在裏許

頌曰

語火是燈 掉頭弗謔 惟賊識賊 一問卽承
淳祐丙午季夏初吉安晚居士書于西湖漁莊

四
字
印

靉邊風月眼中

眼不盡乾坤燈

外燈柳暗苔明

十萬戶敲門處

小舟人應



碧巖集對照目次

第一則 聖諦第一義
 第二則 趙州至道無難
 第三則 馬祖日面佛月面佛
 第四則 德山挾復問答
 第五則 雪峰栗粒
 第六則 雲門日日好日
 第七則 慧超問佛
 第八則 翠巖眉毛
 第九則 趙州四門
 第一〇則 睦州掠虛漢

第一一則 黃檗噀酒糟漢
 第一二則 洞山麻三斤
 第一三則 巴陵銀碗裏雪
 第一四則 雲門一代時教
 第一五則 雲門倒一說
 第一六則 鏡清碎啄機
 第一七則 香林坐久成勞
 第一八則 忠國師無縫塔
 第一九則 俱胝只豎一指
 第二〇則 翠微禪版

第二一則 智門蓮華荷葉
 第二二則 雪峰鼈鼻蛇
 第二三則 保福長慶遊山次
 第二四則 鐵磨老牯牛
 第二五則 蓮華峰拈拄杖
 第二六則 百丈獨坐大雄峰
 第二七則 雲門體露金風
 第二八則 南泉不說底法
 第二九則 大隋隨他去也
 第三〇則 趙州大蘿蔔頭
 第三一則 麻谷持錫遠牀

第三二則 定上座佇立
 第三三則 陳操具隻限
 第三四則 仰山不曾遊山
 第三五則 文殊前後三三
 第三六則 長沙芳草落花
 第三七則 盤山三界無法
 第三八則 風穴祖師心印
 第三九則 雲門花藥欄
 第四〇則 陸互天地同根
 第四一則 趙州大死底
 第四二則 龐居士好雪片片

第四三則 洞山無寒暑
 第四四則 禾山解打鼓
 第四五則 趙州七斤布衫
 第四六則 鏡清雨滴聲
 第四七則 雲門六不收
 第四八則 招慶翻却茶鉢
 第四九則 三聖透網金鱗
 第五〇則 雲門塵塵三昧
 第五一則 雪峯是什麼
 第五二則 趙州渡驢渡馬
 第五三則 百丈野鴨子

第五四則 雲門却展兩手
 第五五則 道吾一家弔慰
 第五六則 欽山一鏃破關
 第五七則 趙州田庫奴
 第五八則 趙州分疎不下
 第五九則 趙州何不引盡
 第六〇則 雲門拄杖化龍
 第六一則 風穴家國興盛
 第六二則 雲門中有一寶
 第六三則 南泉斬却貓兒
 第六四則 趙州頭戴草鞋

第六五則 外道良馬鞭影
 第六六則 巖頭收黃巢劍
 第六七則 傅大士講經竟
 第六八則 仰山汝名什麼
 第六九則 南泉畫一圓相
 第七〇則 瀉山請和尚道
 第七一則 五峯和尚併却
 第七二則 雲巖和尚有也
 第七三則 馬祖四句百非
 第七四則 金牛飯桶
 第七五則 烏白屈棒屈棒

第七六則 丹霞喫飯也未
 第七七則 雲門餠餅
 第七八則 開土入浴
 第七九則 投子一切佛聲
 第八〇則 趙州初生孩子
 第八一則 藥山塵中塵
 第八二則 大龍堅固法身
 第八三則 雲門古佛露柱
 第八四則 維摩不二門
 第八五則 桐峯庵主作虎聲
 第八六則 雲門厨庫山門

第八七則 雲門藥病相治
 第八八則 玄沙三種病人
 第八九則 雲巖大悲手眼
 第九〇則 智門般若體
 第九一則 鹽官犀牛扇子
 第九二則 世尊陞座
 第九三則 大光這野狐精
 第九四則 楞嚴不見
 第九五則 長慶阿羅漢三毒
 第九六則 趙州三轉語
 第九七則 金剛經罪業消滅

第九八則 天平行脚
 第九九則 忠國師十身調御
 御一〇〇則 巴陵吹毛劍

碧巖集對照目次 畢

雪竇和尚百則頌古

第一則 聖諦第一義

舉梁武帝問達磨大師如何是聖諦第一義磨云廓然無聖帝曰對朕者誰磨云不識帝不契達磨遂渡江至魏帝後舉問誌公誌公云陛下還識此人否帝云不識誌公云此是觀音大士傳佛心印帝悔遂遣使去請誌公云莫道陛下發使去取闔國人去佗亦不回

●頌云聖諦廓然何當辨的對朕者誰還云不識因

茲暗渡江豈免生荆棘闖國人追不再來千古萬古
空相憶休相憶清風匝地有何極師顧視左右云這
裏還有祖師麼白云有喚來與老僧洗脚

第二則 趙州至道無難

舉趙州示衆云至道無難唯嫌揀擇纔有語言是揀
擇是明白老僧不在明白裏是汝還護惜也無時有
僧問既不在明白裏護惜箇什麼州云我亦不知僧
云和尚既不知爲什麼却道不在明白裏州云問事
卽得禮拜了退

●頌云。至道無難言端語端一有，多種二無兩般天

際日上月下檻前山深水寒，鬪體識盡喜何立枯木
龍吟銷未乾難難揀擇明白君自看

第三則 馬祖日面佛月面佛

舉馬大師不安院主問和尚近日尊候如何大師曰
日面佛月面佛

●頌云。日面佛月面佛五帝三皇是何物，二十年來
曾苦辛爲君幾下蒼龍窟窟堪述明眼衲僧莫輕忽

第四則 德山挾複問答

舉德山到滌山挾複子於法堂上從東過西從西過
東顧視云無無便出雪竇著語云勘破了也德山至

門首却云也不得草草便具威儀再入相見瀉山坐
次德山提起坐具云和尚瀉山擬取拂子德山便喝
拂袖而出雪竇著語云勘破了也德山背却法堂著
草鞋便行瀉山至晚問首座適來新到在什麼處首
座云當時背却法堂著草鞋出去也瀉山云此子已
後向孤峯頂上盤結草菴呵佛罵祖去在雪竇著語
云雪上加霜

●頌云一勘破二勘破雪上加霜曾嶮墮飛騎將軍
入虜庭再得完全能幾箇急走過不放過孤峯頂上
草裏坐咄

第五則 雪峯粟粒

舉雪峯示衆云盡大地撮來如粟米粒大拋向面前
漆桶不會打鼓普請看

●頌云牛頭沒馬頭回曾溪鏡裏絕塵埃打鼓看來
君不見百花春至爲誰開

第六則 雲門日日好日

舉雲門垂語云十五日已前不問汝十五日已後道
將一句來自代云日日是好日

●頌云去却一拈得七上下四維無等匹徐行踏斷
流水聲縱觀寫出飛禽跡草茸茸煙幕々空生岩畔

花狼籍彈指堪悲舜若多莫動著動著二十棒

第七則 慧超問佛

舉僧問法眼慧超咨和尚如何是佛法眼云汝是慧超

●頌云江國春風吹不起鵬鴣啼在深花裏三級浪高魚化龍癡人猶辱夜塘水

第八則 翠岩眉毛

舉翠岩夏末示衆云一夏以來爲兄弟說話看翠岩眉毛在麼保福云作賊人心虛長慶云生也雲門云關

●頌云翠岩示徒千古無對關字相酬失錢遭罪潦到保福抑揚難得嘮嘮翠岩分明是賊白圭無玷誰辨真假長慶相諳眉毛生也

第九則 趙州四門

舉僧問趙州如何是趙州州云東門西門南門北門
●頌云句裏呈機劈面來爍迦羅眼絕纖埃東西南北門相對無限輪鎚擊不開

第十則 睦州掠虛漢

舉睦州問僧近離甚處僧便喝州云老僧被汝一喝僧又喝州云三喝四喝後作麼生僧無語州便打云

這掠虛頭漢

●頌云兩喝與三喝作者知機變若謂騎虎頭二俱成瞎漢誰瞎漢拈來天下與人看

第十一則 黃檗噀酒糟漢

舉黃檗示衆云汝等諸人盡是噀酒糟漢恁麼行脚何處有今日還知大唐國裏無禪師麼時有僧出云只如諸法匡徒領衆又作麼生檗云不道無禪只是無師

●頌云凜凜孤風不自誇端居寰海定龍蛇大中天子曾輕觸三度親遭弄爪牙

第十二則 洞山麻三斤

舉僧問洞山如何是佛山云麻三斤

●頌云金烏急玉兔速善應何曾有輕觸展事投機見洞山跛鼈盲龜入空谷花簇簇錦簇簇南地竹兮北地木因思長慶陸大夫解道合笑不合哭

第十三則 巴陵銀碗裏雪

舉僧問巴陵如何是提婆宗巴陵云銀碗裏盛雪

●頌云老新開端的別解道銀碗裏盛雪九十六箇應自知不知却問天邊月提婆宗提婆宗赤旛之下起清風

第十四則 雲門一代時教

舉僧問雲門如何是一代時教雲門云對一說

●頌云對一說太孤絕無孔鍊鎚重下楔閣浮樹下笑呵呵昨夜驪龍拗角折別別韶陽老人得一概

第十五則 雲門倒一說

舉僧問雲門不是目前機亦非目前事時如何門云倒一說

●頌云到一說分一節同死同生爲君訣八萬四千非鳳毛三十三人入虎穴別別擾擾忽忽水裏月

第十六則 鏡清啐啄機

舉僧問鏡清學人啐請師啄清云還得活也無僧云若不活遭人怪笑清云也是草裏漢

●頌云古佛有家風對揚遭貶剝子母不相知是誰同啐啄啄覺猶在殼重遭撲天下衲僧徒名邈

第十七則 香林坐久成勞

舉僧問香林如何是祖師西來意林云坐久成勞

●頌云一箇兩箇千萬箇脫却籠頭卸角馱左轉右轉隨後來紫胡要打劉鍊磨

第十八則 忠國師無縫塔

舉肅宗皇帝問忠國師百年後所須何物國師云與

老僧作箇無縫塔，帝曰請師塔樣。國師良久云：會麼？帝云：不會。國師云：吾有付法弟子耽源，却諳此事。請詔問之。國師遷化，後帝詔耽源問：此意如何？源云：湘之南潭，之北雪竇著語云：獨掌不浪鳴，中有黃金充一國。雪竇著語云：山形拄杖子，無影樹下，合同船雪竇著語云：海晏河清，瑠璃殿上無知識。雪竇著語云：拈了也。

●頌云：無縫塔見還難，澄潭不許蒼龍蟠。層落落影團團，千古萬古與人看。

第十九則 俱胝只豎一指

舉俱胝和尚凡有所問，只豎一指。

●頌云：對揚深愛老俱胝，宇宙空來更有誰。曾向滄溟下浮木，夜濤相共接盲龜。

第二十則 翠微禪板

舉龍牙問翠微如何，是祖師西來意。微云：與我過禪板來。牙過禪板，與翠微微接得，便打牙云：打即任打，要且無祖師西來意。牙又問臨濟如何，是祖師西來意。濟云：與我過蒲團來。牙取蒲團過，與臨濟濟接得，便打牙云：打即任打，要且無祖師西來意。

●頌云：龍牙山裏龍無眼，死水何曾振古風。禪板蒲

團不能用只應分付與盧公

●這老漢也未得勦絕復成一頌盧公付了亦何憑坐倚休將繼祖燈堪對暮雲歸未合遠山無限碧層層

第二十一則 智門蓮華荷葉

舉僧問智門蓮花未出水時如何智門云蓮花僧云出水後如何門云荷葉

●頌云蓮花荷葉報君知出水何如未出時江北江南問王老一狐疑了一狐疑

第二十二則 雪峯鼈鼻蛇

舉雪峯示衆云南山有一條鼈鼻蛇汝等諸人切須好看長慶云今日堂中大有喪身失命僧舉似玄沙玄沙云須是稜兒始得雖然如此我即不恁麼僧云和尚作麼生玄沙云用南山作什麼雲門以拄杖攬向雪峯面前作怕勢

●頌云象骨岩高不到到者須是弄蛇手稜師備師不奈何喪身失命有多少韶陽知重撥草南北東西無處討忽然突出拄杖頭拋對雪峯大張口大張口兮同閃電剔起眉毛還不見如今藏在乳峯前來者一一看方便師高聲喝云看脚下

第二十三則 保福長慶遊山次

舉保福長慶遊山次福以手指云只這裏便是妙峯
頂慶云是則是可惜許雪竇著語云今日共這漢遊
山圖箇什麼復云百千年後不道無只是少後舉似
鏡清清云若不是孫公便見鬪醜遍野

●頌云妙峯孤頂草離離拈得分明付與誰不是孫
公辨端的鬪醜著地幾人知

第二十四則 鍊磨老牯牛

舉劉鍊磨到瀉山山云老牯牛汝來也磨云來日臺
山大會齋和尙還去麼瀉山放身臥磨便出去

●頌云曾騎鍊馬入重城勅下傳聞六國清猶握金
鞭問歸客夜深誰共御街行

第二十五則 蓮華峯拈拄杖

舉蓮華峯菴主拈拄杖示衆云古人到這裏爲什麼
不肯住衆無語自代云爲他途路不得力復云畢竟
如何又自代云柳標橫擔不顧人直入千峯萬峰去
●頌云眼裏塵沙耳裏土千峰萬峰不肯住落花流
水太茫茫別起眉毛何處去

第二十六則 百丈獨坐大雄峰

舉僧問百丈如何是奇持事丈云獨坐大雄峰僧禮

拜丈便打

●頌云。祖域交馳。天馬駒化。門舒卷不同。途電光石火。存機變。堪笑人來。捋虎鬚。

第二十七則 雲門體露金風

舉僧問雲門。樹凋葉落時。如何雲門云。體露金風。

●頌云。問既有宗答。亦攸同。三句可辨。一鏃遼空。大野兮涼。颯颯長天兮踈雨濛濛。君不見少林久坐未歸。客靜依熊耳。一叢叢。

第二十八則 南泉不說底法

舉南泉參百丈。涅槃和尚丈問。從上諸聖還有不爲

人說底法。麼泉云。有丈云。作麼生是不爲人說底法。泉云。不是心。不是佛。不是物。丈云。說了也。泉云。某甲只恁麼和尚。作麼生。丈云。我又不是。大善知識。爭知有說不說。泉云。某甲不會。丈云。我。太殺爲爾說了也。●頌云。祖佛從來不爲人。衲僧今古競頭走。明鏡當臺。列像殊。一一面。南看北斗。斗柄垂無處。討拈得鼻孔。失却口。

第二十九則 大隋隨他去也

舉僧問大隋。劫火洞然。大千俱壞。未審這箇壞不壞。隋云。壞僧云。恁麼則隨他去也。隋云。隨他去。

●頌云。劫火光中立。問端。衲僧猶滯。兩重關。可憐一句隨他語。萬里區區。獨往還。

第三十則 趙州大蘿蔔頭

舉僧問。趙州承聞和尙親見南泉。是否。州云。鎮州出大蘿蔔頭。

●頌云。鎮州出大蘿蔔。天下衲僧取。則只知自古。今爭辨。鵠白鳥黑。賊賊衲僧。鼻孔曾拈得。

第三十一則 麻谷持錫遠床

舉麻谷持錫到章敬。遠禪床。三匝振錫。一下卓然而立。敬云。是是雪竇著語。云錯麻谷。又到南泉。遠禪床。

三匝振錫。一下卓然而立。泉云。不是不是。雪竇著語。云錯麻谷。當時云章敬道。是和尙爲什麼。道不是。泉云。章敬即是。汝不是。此是風力所轉。終成敗壞。●頌云。此錯彼錯。切忌拈却。四海浪平。百川潮落。古策風高。十二門門。門有路。空蕭索。非蕭索。作者好求。無病藥。

第三十二則 定上座佇立

舉定上座問。臨濟如何。是佛法。大意濟下。禪床擒住。與一掌。便托開。定佇立。傍僧云。定上座何。不禮拜。定方禮拜。忽然大悟。

●頌云。斷際全機繼。後蹤持來何必在。從容巨靈擡手。無多子分破華山千萬重。

第三十三則 陳操具隻眼

舉陳操尙書看資福。福見來便畫一圓相。操云弟子恁麼來。早是不著。便何況更畫一圓相。福便掩却方丈門。雪竇云。陳操只具一隻眼。

●頌云。團團珠遶玉珊珊。馬載驢駝上鍊船。分付海山無事客。釣鼈時下一圈攣。雪竇復云。天下衲僧跳不出。

第三十四則 仰山不曾遊山

舉仰山問僧。近離甚處。僧云。廬山。山云。曾遊五老峯。麼。僧云。不曾。到山云。闍黎不曾遊山。雲門云。此語皆爲慈悲之故。有落草之談。

●頌云。出草入草誰解尋。討白雲重重。紅日杲杲左顧無瑕。右盼已老。君不見寒山子。行太早。十年歸不得。忘却來時道。

第三十五則 文殊前後三三

舉文殊問無著。近離什麼處。無著云。南方。殊云。南方佛法如何。住持著云。末法。比丘少奉戒律。殊云。多少。衆著云。或三百。或五百。無著問文殊。此間如何。住持

殊云凡聖同居龍蛇混雜著云多少衆殊云前三三後三三

●頌云。千峰盤屈色如藍誰謂文殊是對談堪笑清涼多少衆前三三與後三三

第三十六則 長沙芳草落花

舉長沙一日遊山歸至門首首座問和尙什麼處去來沙云遊山來首座云到什麼處來沙云始隨芳草去又逐落花回座云大似春意沙云也勝秋露滴芙蓉雪竇著語云謝答話

●頌云大地絕纖埃何人眼不開始隨芳草去又逐

落花回羸鶴翹寒木狂猿嘯古臺長沙無限意咄

第三十七則 盤山三界無法

舉盤山垂語云三界無法何處求心

●頌云三界無法何處求心白雲爲蓋流泉作琴一曲兩曲無人會雨過夜塘秋水深

第三十八則 風穴祖師心印

舉風穴在鄖州衙內上堂云祖師心印狀似鍊牛之機去卽印住住卽印破只如不去不住印卽是不印卽是時有盧陂長老出問某甲有鍊牛之機請師不搭印穴云慣釣鯨鯢澄巨浸却嗟蛙步蹶泥沙陂佇

思穴喝云長老何不進語。陂擬議穴打一拂子。穴云還記得話頭麼。試舉看。陂擬開口。穴又打一拂子。牧主云佛法與王法一般。穴云見箇什麼道理。牧主云當斷不斷。返招其亂。穴便下座。

●頌云。擒得盧陂跨鍊牛。三玄戈甲未輕酬。楚王城畔朝宗水。喝下曾令却倒流。

第三十九則 雲門花藥欄

舉僧問雲門如何。是清淨法身門。云花藥欄。僧云便恁麼去。時如何。門云金毛獅子。

●頌云。花藥欄莫顛。預星在秤。兮不在盤。便恁麼太。

無端金毛獅子大家看。

第四十則 陸亘天地同根

舉陸亘大夫與南泉語話。次陸云。肇法師道天地與我同根。萬物與我一體也。甚奇。恠南泉指庭前花。召大夫云。時人見此一株花。如夢相似。

●頌云。聞見覺知非一一。山河不在鏡中觀。霜天月落夜將半。誰共澄潭照影寒。

第四十一則 趙州大死底

舉趙州問投子大死底人。却活時如何。投子云不許。夜行投明須到。

●頌云。活中有眼還同死。藥忌何須鑒。作家古佛尙言。曾未到不知誰解撒塵沙。

第四十二則 龐居士好雪片片

舉龐居士辭藥山。山命十人禪客相送。至門首居士指空中雪云。好雪片片不落別處。時有全禪客云。落在什麼處。士打一掌全云。居士也不得草草。士云。汝恁麼稱禪客。闍老子未放汝在全云。居士作麼生。士又打一掌云。眼見如盲口說如啞。雪竇別云。初問處但握雪團便打。

●頌云。雪團打雪團。打龐老機關沒可把。天上人間

不自知眼裏耳裏絕瀟灑。瀟灑絕碧眼胡僧難辨別。

第四十三則 洞山無寒暑

舉僧問洞山。寒暑到來如何。迴避山云。何不向無寒暑處去。僧云。如何。是無寒暑。處山云。寒時寒殺。闍黎。熱時熱殺。闍黎。

●頌云。垂手還同萬仞崖。正偏何必在安排。琉璃古殿照明月。忍俊韓獺空上階。

第四十四則 禾山解打鼓

舉禾山垂語云。習學謂之聞。絕學謂之鄰。過此二者。是爲真過。僧出問如何。是真過。山云。解打鼓。又問如何。

何是真諦山云解打鼓又問即心即佛即不問如何
是非心非佛山云解打鼓又問向上人來時如何接
山云解打鼓

●頌云一拽石二般土發機須是千鈞弩象骨老師
曾毘毘爭似禾山解打鼓報君知莫莽鹵甜者甜苦
者苦

第四十五則 趙州七斤布衫

舉僧問趙州萬法歸一一歸何處州云我在青州作
一領布衫重七斤

●頌云編辟曾挨老古錐七斤衫重幾人知如今拋

擲西湖裏下載清風付與誰

第四十六則 鏡清雨滴聲

舉鏡清問僧門外是什麼聲僧云雨滴聲清云衆生
顛倒迷已逐物僧云和尚作麼生清云泊不迷已僧
云泊不迷已意旨如何清云出身猶可易脫體道應
難

●頌云虛堂雨滴聲作者難酬對若謂曾入流依然
還不會會不會南山北山轉霧霈

第四十七則 雲門六不收

舉僧問雲門如何是法身門云六不收

●頌云一二三四五六碧眼胡僧數不足少林謾道付神光卷衣又說歸天竺天竺茫茫無處尋夜來却對乳峰宿

第四十八則 招慶翻却茶鉢

舉王太傅入招慶煎茶時朗上座與明招把鉢朗翻却茶鉢太傅見問上座茶爐下是什麼朗云捧爐神太傅云既是捧爐神爲什麼翻却茶鉢朗云仕官干日失在朝太傅拂袖便去明招云朗上座喫却招慶飯了却去江外打野樵朗云和尚作麼生招云非人得其便雪竇云當時但踏倒茶爐

●頌云來問若成風應機非善巧堪悲獨眼龍曾未呈牙爪牙爪開生雲雷逆水之波經幾回

第四十九則 三聖透網金鱗

舉三聖問雪峰透網金鱗未審以何爲食峰云待汝出網來向汝道聖云一千五百人善知識話頭也不識峰云老僧住持事繁

●頌云透網金鱗休云滯水搖乾蕩坤振鬣擺尾千尺鯨噴洪浪飛一聲雷震清颺起清颺起天上人間知幾幾

第五十則 雲門塵塵三昧

舉僧問雲門如何是塵塵三昧門云鉢裏飯桶裏水
●頌云鉢裏桶裏水多口阿師難下背北斗南星位
不殊白浪滔天平地起擬不擬止不止箇箇無親長
者子

第五十一則 雪峰是什麼

舉雪峰住菴時有兩僧來禮拜峰見來以手托菴門
放身出云是什麼僧亦云是什麼峰低頭歸菴僧後
到岩頭頭問什麼處來僧云嶺南來頭云曾到雪峰
麼僧云曾到頭云有何言句僧舉前話頭云他道什
麼僧云他無語低頭歸菴頭云噫我當初悔不向他

道末後句若向伊道天下人不奈雪老何僧至夏末
再舉前話請益頭云何不早問僧云未敢容易頭云
雪峰雖與我同條生不與我同條死要識末後句只
這是

●頌云末後句爲君說明暗雙雙底時節同條生也
共相知不同條死還殊絕還殊絕黃頭碧眼須甄別
南北東西歸去來夜深同看千岩雪

第五十二則 趙州渡驢渡馬

舉僧問趙州久響趙州石橋到來只見略約州云汝
只見略約且不見石橋僧云如何是石橋州云渡驢

渡馬

●頌云孤危不立道方高入海還須釣巨鼈堪笑同時灌溪老解云劈箭亦徒勞

等五十三則 百丈野鴨子

舉馬大師與百丈行次見野鴨子飛過大師云是什麼丈云野鴨子大師云什麼處去也丈云飛過去也大師遂扭百丈鼻頭丈作忍痛聲大師云何曾飛去

●頌云野鴨子知何許馬祖見來相共語話盡山雲海月情依前不會還飛去欲飛去却把住道道

第五十四則 雲門却展兩手

舉雲門問僧近離甚處僧云西禪門云西禪近日有何言句僧展兩手門打一掌僧云某甲話在門却展兩手僧無語門便打

●頌云虎頭虎尾一時收凜凜威風四百州却問不知何大嶮師云放過一著

第五十五則 道吾一家弔慰

舉道吾與漸源至一家弔慰源拍棺云生邪死邪吾云生也不道死也不道源云爲什麼不道吾云不道不道回至中路源云和尚快與某甲道若不道打和尚去也吾云打即任打道即不道源便打後道吾遷

化源到石霜舉似前話霜云生也不道死也不道源云爲什麼不道霜云不道不道源於言下有省源一日將鍬子於法堂上從東過西從西過東霜云作什麼源云覓先師靈骨霜云洪波浩渺白浪滔天覓什麼先師靈骨雪竇著語云蒼天蒼天源云正好著功太原孚云先師靈骨猶在

●頌云免馬有角牛羊無角絕毫絕釐如山如嶽黃金靈骨今猶在白浪滔天何處著無處著隻履西歸曾失却

第五十六則 欽山一鏃破關

舉良禪客問欽山一鏃破三關時如何山云放出關中主看良云恁麼則知過必改山云更待何時良云好箭放不著所在便出山云且來闍黎良回首山把住云一鏃破三關卽且止試與欽山發箭看良擬議山打七棒云且聽這漢疑三十年

●頌云與君放出關中主放箭之徒莫弄鹵取箇眼分耳必聾捨箇耳分目雙瞽可憐一鏃破三關的的分明箭後路君不見玄沙有言兮大丈夫先天爲心祖

第五十七則 趙州田庫奴

舉僧問趙州至道無難唯嫌揀擇如何是不揀擇州云天上天下唯我獨尊僧云此猶是揀擇州云田庫奴什麼處是揀擇僧無語

●頌云似海之深如山之固蚊虻弄空裏猛風螻蟻撼於鍊柱揀兮擇兮當軒布鼓

第五十八則 趙州分踈不下

舉僧問趙州至道無難唯嫌揀擇是時人窠窟否州云曾有人問我直得五年分踈不下

●頌云象王嘔呻獅子哮吼無味之談塞斷人口南
北東西鳥飛兔走

第五十九則 趙州何不引盡

舉僧問趙州至道無難唯嫌揀擇纔有語言是揀擇和尚如何為人州云何不引盡這語僧云某甲只念到這裏州云只這至道無難唯嫌揀擇

●頌云水灑不著風吹不入虎步龍行鬼號神泣頭長三尺知是誰相對無言獨足立

第六十則 雲門拄杖化龍

舉雲門以拄杖示衆云拄杖子化為龍吞却乾坤了也山河大地甚處得來

●頌云拄杖子吞乾坤徒說桃花浪奔燒尾者不在

拏雲攬霧曝腮者何必喪膽亡魂拈了也聞不聞直
須灑灑落落休更紛紛紜紜七十二棒且輕恕一百
五十難放君師薦拈拄杖下座大眾一時走散

第六十一則 風穴家國興盛

舉風穴垂語云若立一塵家國興盛不立一塵家國
喪亡雪竇拈拄杖云還有同生同死底衲僧麼
●頌云野老從教不展眉且圖家國立雄基謀臣猛
將今何在萬里清風只自知

第六十二則 雲門中有一寶

舉雲門示衆云乾坤之內宇宙之間中有一寶秘在

形山拈燈籠向佛殿裏將三門來燈籠上

●頌云看看古岸何人把釣竿雲冉冉水漫漫明月
蘆花君自看

第六十三則 南泉斬却貓兒

舉南泉一日東西兩堂爭貓兒南泉見遂提起云道
得卽不斬衆無對泉斬貓兒爲兩段

●頌云兩堂俱是杜禪和撥動煙塵不奈何賴得南
泉能舉令一刀兩段任偏頗

第六十四則 趙州頭戴草鞋

舉南泉復舉前話問趙州州便脫草鞋於頭上戴出

南泉云子若在恰救得猫兒

●頌云公案圓來問趙州長安城裏任閑遊草鞋頭戴無人會歸到家山即便休

第六十五則 外道良馬鞭影

舉外道問佛不問有言不問無言世尊良久外道讚歎云世尊大慈大悲開我迷雲令我得入外道去後阿難問佛外道有何所證而言得入佛云如世良馬見鞭影而行

●頌云機輪曾未轉轉必兩頭走明鏡忽臨臺當下分妍醜妍醜分兮迷雲開慈門何處生塵埃因思良

馬窺鞭影千里追風喚得回喚得回鳴指三下

第六十六則 岩頭收黃巢劍

舉岩頭問僧什麼處來僧云西京來頭云黃巢過後還收得劍麼僧云收得岩頭引頸近前云因僧云師頭落也岩頭呵呵大笑僧後到雪峯峯問什麼處來僧云岩頭來峯云有何言句僧舉前話雪峯打三十棒趕出

●頌云黃巢過後曾收劍大笑還應作者知三十山藤且輕恕得便宜是落便宜

第六十七則 傅大士講經竟

舉梁武帝請傅大士講金剛經大士便於座上揮案
一下便下座武帝愕然誌公問陛下還會麼帝云不
會誌公云大士講經竟

●頌云不向雙林寄此身却於梁土惹埃塵當時不
得誌公老也是栖栖去國人

第六十八則 仰山汝名什麼

舉仰山問三聖汝名什麼聖云慧寂仰山云慧寂是
我聖云我名慧然仰山呵呵大笑

●頌云雙收隻放若爲宗騎虎由來要絕功笑罷不
知何處去只應千古動悲風

第六十九則 南泉畫一圓相

舉南泉歸宗麻谷同去禮拜忠國師至中路南泉於
地上畫一圓相云道得即去歸宗於圓相中坐麻谷
便作女人拜泉云恁麼則不去也歸宗云是什麼心
行

●頌云由基箭射猿遶樹何太直千箇與萬箇是誰
會中的相呼相喚歸去來曹溪路上休登陟復云曹
溪路坦平爲什麼休登陟

第七十則 瀉山請和尚道

舉瀉山五峰雲岩同侍立百丈百丈問瀉山併却咽

喉唇吻作麼生道瀉山云却請和尚道丈云我不辭
向汝道恐已後喪我兒孫

●頌云却請和尚道虎頭生角出荒草十洲春盡花
凋殘珊瑚樹林日杲杲

第七十一則 五峰和尚併却

舉百丈復問五峰併却咽喉唇吻作麼生道峰云和
尚也須併却丈云無人處斫額望汝

●頌云和尚也併却龍蛇陣上看謀畧令人長憶李
將軍萬里天邊飛一顎

第七十二則 雲岩和尚有也

舉百丈又問雲岩併却咽喉唇吻作麼生道岩云和
尚有也未丈云喪我兒孫

●頌云和尚有也未金毛獅子不踞地兩兩三三舊
路行大雄山下空彈指

第七十三則 馬祖四句百非

舉僧問馬大師離四句絕百非請師直指某甲西來
意馬師云我今日勞倦不能爲汝說問取智藏去僧
問智藏藏云何不問和尚僧云和尚教來問藏云我
今日頭痛不能爲汝說問取海兄去僧問海兄海云
我到這裏却不會僧舉似馬大師馬師云藏頭白海

頭黑

●頌云。藏頭白海頭黑明眼。衲僧會不得馬駒踏殺。天下人臨濟未是白拈賊。離四句絕百非。天上人間唯我知。

第七十四則 金牛飯桶

舉金牛和尚每至齋時。自將飯桶於僧堂前作舞。呵大笑云。菩薩子喫飯來。雪竇云。雖然如此。金牛不是好心。僧問。長慶古人道。菩薩子喫飯來。意旨如何。慶云。大似因齋慶讚。

●頌云。白雲影裏笑呵呵。兩手持來付與他。若是金

毛獅子子三千里外見。諸訛。

第七十五則 烏白屈棒屈棒

舉僧從定州和尚會裏來。到烏白。烏白問定州。法道何似這裏。僧云。不別。白云。若不別。更轉彼中去。便打。僧云。棒頭有眼。不得草草打。人白云。今日打著一箇。也。又打三下。僧便出去。白云。屈棒元來有人喫。在僧轉身云。爭奈杓柄在和尚手裏。白云。汝若要山僧回。與汝僧近前奪。白手中棒打。白三下。白云。屈棒屈棒。僧云。有人喫。在白云。草草打著箇。漢僧便禮拜。白云。和尚却恁麼去也。僧大笑。而出。白云。消得恁麼消得。

恁麼

●頌云呼即易遣即難互換機鋒子細看劫石固來猶可壞滄溟深處立須乾烏白老烏白老幾何般與他杓柄太無端

第七十六則 丹霞喫飯也未

舉丹霞問僧甚處來僧云山下來霞云喫飯了也未僧云喫飯了霞云將飯來與汝喫底人還具眼麼僧無語長慶問保福將飯與人喫報恩有分爲什麼不具眼福云施者受者二俱瞎漢長慶云盡其機來還成瞎否福云道我瞎得麼

●頌云盡機不成瞎按牛頭喫草四七二三諸祖師寶器持來成過咎過咎深無處尋天上人間同陸沉

第七十七則 雲門餽餅

舉僧問雲門如何是超佛越祖之談門云餽餅

●頌云超談禪客問偏多縫罅披離見也麼餽餅壑來猶不住至今天下有諸訛

第七十八則 開士入浴

舉古有十六開士於浴浴時隨例入浴忽悟水因諸禪德作麼生會他道妙觸宣明成佛子住也須七穿八穴始得

●頌云。了事衲僧消一箇長連床上展脚臥夢中曾
說悟圓通香水洗來薰面唾

第七十九則 投子一切佛聲

舉僧問投子一切聲是佛聲是否投子云是僧云和
尚莫尿沸碗鳴聲投子便打又問麤言及細語皆歸
第一義是否投子云是僧云喚和尚作一頭驢得麼
投子便打

●頌云。投子投子機輪無阻放一得二同彼同此可
憐無限弄潮人畢竟還落潮中死忽然活百川倒流
開滌滌

第八十則 趙州初生孩子

舉僧問趙州初生孩子還具六識也無趙州云急水
上打毬子僧復問投子急水上打毬子意旨如何子
云念念不停流

●頌云。六識無功伸一問作家曾共辨來端茫茫急
水打毬子落處不停誰解看

第八十一則 藥山塵中塵

舉僧問藥山平田淺草塵鹿成群如何射得塵中塵
山云看箭僧放身便倒山云侍者拖出這死漢僧便
走山云弄泥團漢有什麼限雪竇拈云三步雖活五

步須死

●頌云。塵中塵君看取。下一箭走三步。五步若活。成群趁虎。正眼從來付獵人。雪竇高聲云。看箭。

第八十二則 大龍堅固法身

舉僧問大龍。色身敗壞如何。是堅固法身。龍云。山花開似錦。澗水湛如藍。

●頌云。問曾不知答。還不會。月冷風高。古岩寒檜。湛笑路逢達道人。不將語默對手把。白玉鞭。驪珠盡擊破。不擊破。增瑕。類國有憲章。三千條罪。

第八十三則 雲門古佛露柱

舉雲門示衆云。古佛與露柱相交。是第幾機。自代云。南山起雲。北山下雨。

●頌云。南山雲北山。雨四七二。三相相親。新羅國裏。曾上堂。大唐國裏。未打鼓。苦中樂樂中。苦誰道。黃金如糞土。

第八十四則 維摩不二法門

舉維摩詰問文殊師利。何等是菩薩入不二法門。文殊曰。如我意者。於一切法。無言無說。無示無識。離諸問答。是爲入不二法門。於是文殊師利問維摩詰。我等各自說已。仁者當說何等是菩薩入不二法門。雪

寶云維摩道什麼復云勘破了也

●頌云。咄這維摩老悲生空懊惱臥疾毘耶離全身太枯槁七佛祖師來一室且頻掃請問不二門當時便靠倒不靠倒金毛獅子無處討

第八十五則 桐峯菴主作虎聲

舉僧到桐峯菴主處便問這裏忽逢大蟲時又作麼生菴主便作虎聲僧便作怕勢菴主呵呵大笑僧云這老賊菴主云爭奈老僧何僧休去雪竇云是則是兩箇惡賊只解掩耳偷鈴

●頌云。見之不取思之千里好箇斑斑爪牙未備君

不見大雄山下忽相逢落落聲光皆振地大丈夫見也無收虎尾兮捋虎鬚

第八十六則 雲門厨庫三門

舉雲門垂語云人人盡有光明在看時不見暗昏昏作麼生是諸人光明自代云厨庫三門又云好事不如無

●頌云。自照列孤明爲君通一線花謝樹無影看時誰不見見不見倒騎牛兮入佛殿

第八十七則 雲門藥病相治

舉雲門示衆云藥病相治盡大地是藥那箇是自己

●頌云。盡大地是藥。古今何太錯。閉門不造車。通途自寥廓。錯錯鼻孔。遼天亦穿却。

第八十八則 玄沙三種病人

舉玄沙示衆云。諸方老宿。盡道接物利生。忽遇三種病人。來作麼生接。患盲者。拈錘豎拂。他又不見。患聾者。語言三昧。他又不聞。患啞者。教伊說。又說不得。且作麼生接。若接此人。不得佛法。無靈驗。僧請益雲門。雲門云。汝禮拜著。僧禮拜起。雲門以拄杖。拄僧退後。門云。汝不是患盲。復喚近前來。僧近前。門云。汝不是患聾。門乃云。還會麼。僧云。不會。門云。汝不是患啞。僧

欠

欠

●頌云。前箭猶輕。後箭深誰。云。黃葉是黃金。曹溪波浪如相似。無限平人被陸沉。

第九十四則 楞嚴不見

舉楞嚴經云。吾不見時。何不見。吾不見之處。若見。不見。自然。非彼。不見之相。若不見。吾不見之地。自然。非物。云何。非汝。

●頌云。全象全牛。醫不殊。從來作者共名模。如今要見。黃頭老刹。剎塵塵在半途。

第九十五則 長慶阿羅漢三毒

舉長慶有時云。寧說阿羅漢。有三毒。不說如來。有二一。

種語不道如來無語只是無二種語保福云作麼生是如來語慶云聾人爭得聞保福云情知爾向第二頭道慶云作麼生是如來語保福云喫茶去

●頌云頭兮第一第二臥龍不鑿止水無處有月波澄有處無風浪起稜禪客稜禪客三月禹門遭點額

第九十六則 趙州三轉語

舉趙州示衆三轉語

●頌云泥佛不渡水神光照天地立雪如未休何人不雕偽

●頌云金佛不渡鑪人來訪紫胡牌中數箇字清風

何處無

●頌云木佛不渡火常思破竈墮杖子忽擊箸方知辜負我

第九十七則 金剛經罪業消滅

舉金剛經云若為人輕賤是人先世罪業應墮惡道以今世人輕賤故先世罪業則為消滅

●頌云明珠在掌有功者賞胡漢不來全無伎倆伎倆既無波旬失途瞿曇瞿曇識我也無復云勘破了也

第九十八則 天平行脚

舉天平和尚行脚時參西院常云莫道會佛法覓箇
舉話人也無一日西院遙見召云從漪平舉頭西院
云錯平行三兩步西院又云錯平近前西院云適來
這兩錯是西院錯是上座錯平云從漪錯西院云錯
平休去西院云且在這裏過夏待共上座商量這兩
錯平當時便行後住院謂衆云我當初行脚時被業
風吹到思明長老處連下兩錯更留我過夏待共我
商量我不道恁麼時錯我發足向南方去時早知道
錯了也

●頌云禪家流愛輕薄滿肚參來用不著堪悲堪笑

天平老却謂當初悔行脚錯錯西院清風頓錯鑠復
云忽有箇衲僧出云錯雪竇錯何似天平錯

第九十九則 忠國師十身調御

舉肅宗帝問忠國師如何是十身調御國師云檀越
踏毘盧頂上行帝云寡人不會國師云莫認自己清
淨法身

●頌云一國之師亦強名南陽獨許振嘉聲大唐扶
得真天子曾踏毘盧頂上行鍊鎚擊碎黃金骨天地
之間更何物三千刹海夜沉沉不知誰入蒼龍窟

第一百則 巴陵吹毛劍

舉僧問巴陵如何是吹毛劍陵云珊瑚枝枝撐著月
 ●頌云要平不平大巧若拙或指或掌倚天照雪大
 治兮磨礪不下良工兮拂拭未歇別別珊瑚枝枝撐
 著月

萬斛盈舟信手拏

却因一粒糞吞蛇

拈提百轉舊公案

撒却時人幾眼沙

雪竇和尚百則頌古

葛藤集卷上標題

二祖安心……………一	六祖衣鉢……………一	五祖他奴……………一
雲門須彌……………一	馬祖即心……………一	趙州放下……………二
兜率三關……………二	靈雲見桃……………二	趙州柏樹……………二
黃龍三關……………二	瑞巖主人……………三	趙州勸婆……………三
郎中地獄……………三	長生混沌……………三	孤峯不白……………四
牛過窓櫺……………四	乾峯三種……………四	山谷木犀……………四
香巖樹上……………五	雲門屎橛……………五	雲門蘇盧……………五
德山托鉢……………五	馬祖西江……………六	不入涅槃……………六
石霜竿頭……………六	香巖擊竹……………六	心隨萬境……………六
倩女離魂……………六	雲門露字……………七	密庵沙盆……………七

國師三喚……………七	懶山有句……………七	南泉鎌子……………九
百丈野狐……………九	關山賊機……………九	二僧捲簾……………〇
虛空爲紙……………〇	賢女屍林……………〇	漂墮鬼國……………〇
秀才造論……………〇	室內一燈……………二	心身共捨……………二
達磨不來……………二	丹霞燒佛……………二	寤寐恒一……………三
趙州無字……………三	佛直祖曲……………三	女子出定……………三
水上行話……………三	法華禪定……………三	大通智勝……………三
黃龍念讚……………三	馬祖鹽醬……………三	柏樹托鉢……………三
張公喫酒……………三	鼓山伽陀……………三	一失人身……………四
首山此經……………四	興化打中……………四	滄山水牯……………四
古帆未掛……………四	洞山三斤……………四	南堂異類……………四
無功德話……………五	千尺井中……………五	大梅梅子……………五

法燈未了……………一五	南泉油糍……………一五	無鬚鎖子……………一六
外道六師……………一六	芭蕉拄杖……………一六	世尊未說……………一六
圓悟過門……………一六	莫妄想話……………一六	錯用心話……………一六
仰山枕子……………一七	三佛夜話……………一七	馬祖翫月……………一七
佛不知有……………一七	臨濟孤峯……………一七	語默離微……………一八
仰山白槌……………一八	六祖風幡……………一八	五家評商……………一八
百草頭話……………一八	願空諸有……………一八	女子定答……………一九
見色明心……………一九	別峯相見……………一九	南泉水牯……………一九
雲門三句……………一九	薰風自南……………一九	百丈開田……………二〇
華嚴心喻……………二〇	運菴反衣……………二〇	讚六祖偈……………二〇
一子出家……………二〇	圓悟投機……………二〇	夾山境話……………二〇
袈裟裹鞋……………二〇	夾山掘坑……………二〇	朝聞夕死……………二二

平常是道	井樓請救	路逢死蛇
慈明行心	大燈三問	維摩金粟
胡子無鬚	心不是佛	清稅孤貧
維摩丈室	佛性三轉	世尊初生
南泉失火	馮山摘茶	百丈不食
南嶽說似	洛浦供養	雲門一曲
趙州救火	黃檗烏藤	濟下三評
世尊蓮目	東西密付	孔子一變
治生產業		

葛藤集卷下標題

德山燒疏	洞山地神	興化罰錢

麻谷手巾	疎山壽塔	填王思佛
首山竹篋	世尊拈華	迦葉剎竿
廣惠罪業	乾峯一路	南岳磨磚
兜率荔枝	佛境魔境	松源三轉
虛堂三問	大燈三轉	南泉住菴
慈明榜字	慈明盆水	鐘聲七條
微細流注	法雲示衆	仰山撲鏡
雲門舉令	陳操登樓	婆子燒庵
別有生涯	一言駟馬	法身喫飯
虛堂兩字	臨濟三句	華嚴法界
洞山夏末	曹山大海	毘婆尸偈
雲門失通	殃崛產難	巖頭渡子

麻谷鋤草……………四	皓月償債……………三五	大燈鐵話……………三五
佛教祖意……………三五	末後評頌……………三五	慈明執爨……………三五
慈明虎聲……………三五	慈明脫履……………三六	維摩本有……………三六
臨濟赤肉……………三六	臨濟四境……………三六	臨濟四喝……………三七
一喝商量……………三七	濟賓主句……………三七	四賓主話……………三七
百丈再三……………三八	慈明連喝……………三八	興化一劃……………三八
南院降啄……………三九	虛堂拄杖……………三九	臨濟築拳……………三九
洞山三頓……………四〇	慈明論棒……………四〇	州勘菴主……………四〇
瑯琊先照……………四〇	臨濟栽松……………四〇	百丈說了……………四〇
德山行棒……………四〇	臨濟瞎驢……………四〇	張拙看經……………四〇
南方一棒……………四〇	文殊來參……………四〇	一拳拳倒……………四〇
雪峯打僧……………四〇	善財採藥……………四〇	投子答佛……………四〇

雲門喚遠……………四四	楞嚴轉物……………四五	守廓跋鼈……………四五
長沙斲月……………四四	臨濟洗脚……………四四	臨濟四料……………四四
陸互笑哭……………四四	臨濟四用……………四四	乾峯舉一……………四四
文殊起見……………四七	徹翁遺誠……………四七	無邊刹境……………四七
樂天問法……………四七	浮盃答婆……………四七	色卽是空……………四七
臨濟教化……………四七	趙州爐話……………四七	馮山舉米……………四八
常侍看毬……………四八	福田惡道……………四八	清淨本然……………四八
荒草不鋤……………四八	金翅烏王……………四八	折半裂三……………四九
齋僧功德……………四九	瑯琊洪鐘……………四九	法無二法……………四九
菩提宿將……………五〇	莊嚴三昧……………五〇	一切放下……………五〇
擊動法鼓……………五〇	心地含種……………五〇	空空法界……………五〇
一法若有……………五一	補陀巖上……………五一	圓相因起……………五一

宏智四借……………五二	生解未分……………五二	智不到處……………五二
古德大死……………五二	惠覺無罪……………五二	宏智八句……………五二
蹈若不噴……………五二	月夜斷索……………五二	憲宗問光……………五二
大王來也……………五三	路逢達道……………五三	黃檗禮佛……………五三
那吒折肉……………五三	隱峯推車……………五三	關山罵僧……………五三
許老胡知……………五四	十智同真……………五四	天皇恁麼……………五四
夾山法身……………五五	茶陵投機……………五五	白雲未在……………五五
太宗擎鉢……………五五	斷百思想……………五五	趙州石橋……………五五
佛早留心……………五五	洞山菓子……………五五	長慶拄杖……………五五
僧被蛇咬……………五六	國師水碗……………五六	三界輪回……………五六
明眼落井……………五六	首山綱宗……………五六	撲落非他……………五七
南泉遷化……………五七		

葛藤集卷上

二祖慧可問達磨大師云某心未安乞師安心師云將心來與汝安祖云覓心不可得師云與汝安心竟

六祖因明上座趨至大庾嶺祖見明至卽擲衣鉢於石上云此衣表信可力爭耶任君將去明遂舉之如山不動踟躕悚慄明云我來求法非爲衣也願行者開示祖云不思善不思惡正與麼時那箇是明上座父母未生已前本來面目明當下大悟遍體汗流泣淚作禮問云上來密語密意外還更有

意旨否祖曰我今爲汝說者卽非密也汝若返照自己面目密却在汝邊明云某甲雖在黃梅隨衆實未省自己面目今蒙指授入處如人飲水冷暖自知今行者卽是某甲師也祖云汝若如是則吾與汝同黃梅善自護持

東山演禪師示衆曰釋迦彌勒猶是渠奴且道渠是阿誰

雲門因僧問不起一念時却有過也無門云須彌山明州大梅山法常禪師問馬祖云如何是佛祖云卽心卽佛後有僧又問如何是佛祖云非心非佛

嚴陽尊者問趙州一物不將來時如何州云放下著者云已是一物不將來放下這什麼州云恁麼則擔取去者於言下大悟

兜率悅和尚設三關問學者撥艸參玄只圖見性卽今上人性在甚處識得自姓方脫生死眼光落地時作麼生脫脫得生死便知去處四大分離向甚麼處去

福州靈雲志勒禪師因見桃花悟道有頌云三十年來尋劍客幾回葉落又抽枝自從一見桃花後直至如今更不疑後學似瀉山山曰從緣入者永不

退失汝善護持。立沙聞云：諦當甚諦當，敢保老兄，猶未徹在雲門。云：說甚徹不徹？更參三十年。後來大川濟和尚上堂，僧出舉前頌，問大川答云：作賊人心虛。

趙州因僧問如何，是祖師西來意。州云：庭前柏樹子。僧云：和尚莫將境示人。州云：我不將境示人。僧云：如何？是祖師西來意。州云：庭前柏樹子。後來法眼問覺鐵齒云：承聞趙州有柏樹子話，是否？齒云：先師無此話。莫謗先師。眼云：真獅子兒，能獅子吼。黃龍禪師問隆慶閑禪師云：人人有箇生緣處，如何？

是汝生緣處。對曰：早晨喫白粥。至今又覺飢。又問我手何似？佛手對曰：月下弄琵琶。又問我脚何似？驢脚對云：鷺鷥立雪，非同色。師每以此三語問學者，莫能契其旨。天下叢林目爲三關。纔有酬者，師無可否。斂目危坐，人莫涯其意。延之又問其故。師云：已過關者，掉臂徑去。安知有關？吏從吏問：可否？此未透關者也。

瑞巖彥和尚每日自喚主人公，復自應諾，乃云：惺惺着。喏。他時異日，莫受人瞞。喏。喏。

臺山路上有一婆子，凡有僧問臺山路向甚麼處去。

婆云驀直去僧纔行三五步婆云好箇師僧又與麼去後有僧舉似趙州州云待我去爲爾勘過這婆子明日便去亦如是問婆亦如是答州歸謂衆云臺山婆子被我勘破了也

崔郎中問趙州從上諸聖還墮地獄也無州云驀上落中云已是大善知識爲甚還落地獄州云我若不墮爭得救郎中

長生問靈雲混沌未分時如何雲云露柱懷胎生云分後如何雲云如片雲點大清生云未審大清還受點也無雲不答生云恁麼則含生不來也雲亦

不答生云直得純清絕點時如何雲云猶是真常流注生云如何是真常流注雲云似鏡長明生云向上還有事也無雲云有生云作麼生是向上事雲云打破鏡來與汝相見長生問混沌未分時含生何來師云如露柱懷胎

僧問曹山云雪覆千山爲甚麼孤峰不白山云須知異中異僧云如何是異中異山云不墮諸山色五祖演禪師曰譬如水牯牛過窓櫺頭角四蹄都過了因甚麼尾巴過不得

乾峰和尚上堂曰法身有三種病二種光須是一透

葛藤集卷上
過始解穩坐地雲門出衆云庵內人爲甚麼不知
庵外事峰呵呵大笑門云猶是學人疑處峰云子
是什麼心行門云也要和尚相委悉峰云直須恁
麼穩密始解穩坐地門云喏喏

山谷一日參晦堂和尚堂云所公諳書中有一兩句
仲尼曰以吾爲隱乎二三子吾無隱乎爾甚與宗
門事恰好也公知之麼云不知時晦堂與山谷山
行之次天香滿山堂問曰公聞木犀花香麼云聞
堂曰吾無隱乎爾山谷忽悟去也經兩月後庭堅
叅死心禪師死心一拶曰心長老死學士死燒爲

兩堆灰恁麼時向什麼處相見庭堅擬議無如何
後在懸南道中晝寢及覺不覺忽悟得死心用處
從是得大自在之三昧

香巖知閑禪師云如人上樹口啣樹枝手不攀枝脚
不踏樹樹下有人問西來意不對即違他所問若
對又喪身失命正與麼時作麼生對有虎頭上座
云上樹卽不問末上樹請和尚道師呵呵大笑雪
竇云樹上道卽易樹下道卽難老僧上樹致將一
問來

卮庵顏禪師問空東山云香巖樹上意旨如何山云

好對春風唱鷓鴣

僧問雲門如何是佛門云乾屎橛

雲門示衆云平地上死人無數出得荊棘林者好手
時有僧出云恁麼則堂中第一座有長處也門云
蘇廬蘇廬

雪峰在德山會下作飯頭一日齋晚德山托鉢下至
法堂峰云鐘未鳴鼓未響這老漢托鉢向什麼處
去山無語低頭歸方丈雪峰舉似巖頭頭云大小
德山不會末後句山問令侍者喚至方丈問云汝
不肯老僧那頭密啓其意山至來日上堂與尋常

不同頭於僧堂前撫掌大咲曰且喜此老漢會末
後句他後天下人不奈他何雖然如是只得三年
活果三年化去

僧問密庵傑和尚德山托鉢意旨如何庵云無意旨
曰因什麼托鉢下僧堂庵云要行便行要坐便坐
龐居士參馬祖便問不與萬法爲侶者是什麼人祖
云待爾一口吸盡西江水卽向爾道士豁然大悟
作頌曰十方同聚會箇箇學無爲此是選佛場心
空及第歸

文殊所說摩訶般若曰清淨行者不入涅槃破戒比

丘不墮地獄

石霜和尚云百尺竿頭如何進步

香巖知閑禪師一日芟除艸木因以瓦礫擊竹作聲廓然省悟乃述頌曰一擊忘前知更不假修治動容揚古路不墮悄然機處處無蹤跡聲色忘威儀諸方達道者咸言上上機

第二十二祖摩拏羅尊者傳法偈曰心隨萬境轉處實能幽隨流認得性無喜亦無憂瑯琊覺拈云可恁麼不可恁處

五祖演禪師問僧云倩女離魂那箇是真底

虛堂倩女離魂頌云行弔先桃茆喪車後紙錢老胡門下客寧可入黃泉

僧問雲門殺父殺母向佛前懺悔殺佛殺祖向甚麼處懺悔門云露

天童密庵咸傑禪師一日應庵問如何是正法眼密曰破沙盆應領之

雙杉元禪師戒行嚴潔住秀之天寧小參舉應庵華因問密庵如何是正法眼庵云破沙盆拈云者些說話如了又路口多年一條爛木頭風吹日炎道印文在什麼處五陵公子少年時得意春風躍

馬蹄不惜黃金作彈子，海棠花下打黃鸝。元和尙
爲甚別不提唱，唯拈古詩一篇。

南陽忠國師三喚侍者，侍者三應諾。國師云：將謂吾
辜負汝，元來却是汝辜負吾。

福州長慶懶安和尚示衆云：有句無句，如藤倚樹，踈
山聞得道，我有一轉語要問者。老子夏罷遂入
閩，見懶安和尚，又謂之：瀉山和尚，裴相國師，閩自
瀉山請住長慶，踈山到彼，值師泥壁，次踈山便問
有句無句，如藤倚樹，是和尚語否？瀉山云：是踈山
云：忽然樹倒藤枯，句歸何處？瀉山放下泥盤，呵呵。

大笑歸方丈，踈山云：某甲三千里外賣却布單，特
爲此事來，和尚爲甚不與某甲說？瀉山云：侍者將
錢來與者，矮閣黎去。他日有獨眼龍爲汝點破去。
在後到，明招舉前話，招云：瀉山頭正，尾正，只是不
遇知音。踈山云：忽然樹倒藤枯，句歸何處？招云：更
使瀉山咲轉，新踈山當下有省，乃云：瀉山元來咲
中有刀，後來大惠禪師在圓悟會裡，悟遂令居擇
木堂，作不釐務，侍者每日同士大夫入室，圓悟只
舉有句無句，如藤倚樹，大惠纔開口，悟便道：不是，
如是將半年，一日同趙表之方丈，藥石次把筓，在

手忘了喫飯圓悟顧師而語表之曰只這漢參得黃楊木禪也師遂引狗看熱油鐺爲喻圓悟曰只這便是金剛圈栗棘蓬居無何扣圓悟曰聞和尚嘗問五祖此話不知記其答否圓悟笑而已師云若對人天衆前問今豈無知者耶圓悟乃云向問有句無句如藤倚樹時如何祖云描也描不成畫也畫不就又問忽遇樹倒藤枯時如何祖云相隨來也師聞舉乃抗聲曰某甲會也圓悟曰只恐爾透公案不得云請和尚舉圓悟遂舉師出語無滯圓悟曰今日方知吾不汝欺也遂著臨濟正宗記

以付之俾掌記室分座訓徒

南泉在山作務次僧問南泉路向何處去泉拈起鎌子云我者第鎌子買得三十錢僧云不問第鎌子南泉路向何處去泉云我使得甚快也

百丈山大智禪師凡參次有一老人常隨衆聽法衆退老人亦退忽一日不退師遂問面前立者復是何人老人云某甲非人也於過去迦葉佛時曾住此山因學人問大修行底人還落因果也無某甲答他云不落因果後五百生墮野狐身今請和尚代一轉語貴脫野狐身遂問大修行底人還落因果

果也無師云不昧因果老人於言下大悟作禮云
某甲已脫野狐身遂住在山後敢告和尚乞依亡
僧事例師令維那白槌告衆曰食後送亡僧大衆
言議一衆皆安涅槃堂又無病人何故如是食後
只見師領衆至山後巖下以拄杖指出一死野狐
乃依法火葬師至晚上堂舉前因緣黃檗便問古
人錯祇對一轉語五百生墮野狐身轉轉不錯合
作箇什麼師云近前來與爾道檗遂近前與師一
掌師拍手笑曰將謂胡鬚赤更有赤鬚胡
關山和尚曰拍樹子話有賊之機

清涼大法眼因僧齋前上參次眼以手指簾時有二
僧同去捲簾眼云一得一失

五祖演禪師示衆云若有人虛空爲紙大海爲硯須
彌爲筆如何書得祖師西來五字若書得西來意
五字老僧展坐具禮拜

世尊因七賢女遊屍陀林一女指屍謂諸姊云屍在
這裡人向甚處去中有一姊云作麼作麼諸姊諦
觀各各契悟

于頤相公問紫玉如何是黑風吹其船舫漂墮羅刹
鬼國師云于頤這客作漢問恁麼事作什麼于當

時失色師指云祇這箇便是漂墮羅刹鬼國于聞已信受

昔有秀才造無鬼論成纔放筆忽一鬼現身斫手謂秀才曰爾爭奈我何五祖演道我當時若見便以手作勃鳩觜向伊道谷谷呱南堂靜曰秀才雖知無鬼而不知鬼之所以無五祖先師雖知鬼之所以無而不能掃蹤滅跡若是大隋卽不然待他斫手道爾爭奈我何只向道閣直饒是大力鬼王也教伊頭破作七分如阿梨樹枝且道是那箇閣字汝道無我響

香林遠禪師僧問如何是室內一盞燈遠云三人證

龜作鼈

黃檗運禪師示衆云內外身心一切共可捨凡人多不肯空心恐落於空不知自心本空愚人除事不除心智者除心不除事菩薩心如虛空一切共捨所作福德皆不貪著然捨有三等內外身心一切俱捨猶如虛空無所取着然後隨方應物能所皆忘是爲大捨若一邊行道布德一遍施捨無希望心是爲中捨若廣修衆善有所希望聞法知空遂乃不着是爲小捨大捨如火燭在前更無迷悟中

捨如火燭在傍或明或暗小捨如火燭在後不見坑穿故

福州玄沙備禪師因雪峰呼爲頭陀每見之曰再來人也何不徧參去對云達磨不來東土二祖不往西天雪峰然之

丹霞然禪師嘗到洛京惠林寺值天寒遂於殿中取木佛燒向火院主偶見呵責云何得燒我木佛師以杖撥灰云吾燒取舍利主云木佛安有舍利師云既無舍利更請兩尊再取燒之院主自眉鬚墮落

首楞嚴經曰寤寐恒一

趙州因僧問狗子還有佛性也無州云無僧云一切衆生皆有佛性狗子爲什麼卻無州云爲伊有業識性在又有僧問狗子還有佛性也無州云有僧云既有爲甚卻撞入這箇皮袋裡州云爲他知而故犯

佛說直祖師爲甚麼唱曲

婺州義烏稠巖了贊禪師題無字頌云趙州狗子無佛性萬壘青山隱古鏡赤脚波斯入大唐八臂那吒行正令

中峰本和尚曰趙州因甚道箇無字謂之中峰八箇字或謂之因甚道話

大惠曰趙州無字祇麼舉

古人云此僧未問佛性趙州未答無時如何

古德云透徹看

昔文殊至諸佛集處值諸佛各還本所惟一女人近彼佛坐入於三昧文殊乃白佛言何此女人得近佛坐而我不得佛告文殊汝但覺此女令從三昧起汝自問之文殊遶女人三匝鳴指一下乃托至梵天盡其神力而不能出世尊云假使百千文

殊亦出此女人定不得下方過四十二億河砂國土有罔明菩薩能出此女人定須與罔明大士從地湧出禮拜佛佛勅罔明却至女人前鳴指一下女人於是從定而立

僧問雲門如何是諸佛出身處門曰東山水上行

法華曰深入禪定見十方佛

法華經曰大通智勝佛十劫坐道場佛法不現前不得成佛道

黃龍和尚住黃檗時室中每舉曰鐘樓上念讚床脚下種菜勝首座下一轉語道猛虎當路坐他便退

黃檗與他住自居積翠菴

馬祖既得法直往江西建立宗旨一日讓和尚曰道
一在江西說法總不見持箇消息來遂囑一僧云
汝去待他上堂即問作麼生看他道甚麼記取來
其僧依教去見上堂便出問作麼生師云自從胡
亂後二十年不曾少盪醬喫師然之

趙州栢樹子與德山托鉢是同是別乎

古人云張公喫酒李公醉

鼓山珪云十年海上覓冤讎不得冤讎未肯休芍藥
花開菩薩面椶櫚葉散夜叉頭

梵網經云一失人身萬劫不復

首山念禪師僧問一切諸佛皆自此經出如何是此
經師云低聲低聲僧云如何受持師云不污染

興化獎禪師因僧問四方八面來時如何師云打中
間底僧便禮拜師云山僧昨日赴箇村齋途中遇
一陣狂風暴雨向古廟裡避得過

應菴華云衆中商量道向古廟裡避得過是空劫
已前自己又道便是他安身立命處殊不知興化
腰纏十萬貫騎鶴下揚州

滄山祐禪師示衆云老僧百年後向山下檀越家作

一頭水牯牛於左脇下書五字云瀉山僧某甲此時若喚作瀉山僧又是水牯牛喚作水牯牛又云瀉山僧某甲且道喚作甚麼即得仰山出禮拜而去

僧問巖頭古帆未掛時如何頭云小魚吞大魚云掛後如何頭云後園驢喫草虛堂問南浦曰古帆未掛時如何浦云蟪蛄眼裡五須彌堂云掛後如何浦云黃河向北流

僧因問洞山如何是佛山云麻三斤南堂十辨驗云須向異類中行

達磨大師見梁武帝帝問朕起寺度僧有何功德磨云無功德

性空禪師僧問如何是祖師西來意師云若人在千尺井中不假寸繩出得此人即答汝西來意僧云近日湖南鴨和尚出世亦爲人東語西話師乃喚沙彌寂子拽出這死屍看仰山後舉似耽源如何出得井中人源云咄癡漢誰在井中仰山不契後又問瀉山如何出得井中人山乃召云慧寂寂應諾山云出了也寂後住仰山常舉前話示衆云我於耽源處得體瀉山處得用

龐居士因問大梅常和尚久聞大梅未審梅子熟未也師云何處著觜居士云百雜碎師展手云我還核子來居士無語

法燈示衆云本欲深藏巖岳隱遁過時奈清涼老人有未了公案出來與他了却時有僧出問如何是未了公案燈便打云祖禪不了殃及兒孫

南泉願禪師一日不赴堂侍者請赴堂師云我今日在莊上喫油糍飽者云和尚不曾出入師云汝去問莊主者方出門忽見莊主歸謝和尚到莊喫油糍

石霜諸禪師僧問如何是和尙深々處師曰無鬚鎖子兩頭搖

大珠和尚因維摩座主問經云彼外道六師等是汝之師因其出家彼師所墮汝亦隨墮其施汝者不名福田供養汝者墮三惡道謗於佛毀於法不入衆數終不得滅度汝若如是乃可取食今請禪師明爲解說珠云迷徇六根者號之爲六師心外求佛名爲外道有物可施不名福田生心受供墮三惡道汝若能謗於佛者是不着佛求毀於法者是不着法求不入衆數者是不着僧求終不得滅度

者智用現前若有如是解者便得法喜禪悅之食
芭蕉和尚示衆云你有主丈子我與你主丈子你無
主丈子我奪你主丈子虛堂愚拈云請各放下者
主丈子且道三轉語還有優劣也擊拂子
世尊臨入涅槃文殊請佛再轉法輪世尊咄云吾四
十九年住世未嘗說一字汝請吾再轉法輪是曾
轉法輪耶

圓悟勤禪師僧問如何是佛師曰口是禍門

汾州無業國師凡有請問但云莫妄想

天童應庵華禪師上堂云參禪人切忌錯用心悟明

見性是錯用心成佛作祖是錯用心看經講教是
錯用心行住座臥是錯用心喫飯是錯用心屙屎
送尿是錯用心一動一靜一往一來是錯用心歸
宗不敢與諸人說法何故一字入公門九牛牽不
出

僧問仰山法身還解說法也無山云我說不得別在
一人說得僧曰說得底人在什麼處山推出枕头
瀉山聞乃云寂子用劍刃上事

五祖演三佛侍於一亭上夜語及歸燈已滅演於暗
中曰各下一轉語佛鑑曰彩鳳舞丹青佛眼曰鐵

地橫古路佛果曰看脚下演曰滅吾宗者乃克勒爾

百丈海西堂藏南泉願侍馬祖既月次祖曰正恁麼時如何堂曰正好供養丈云正好修行南泉拂袖便去祖云經入藏禪歸海惟有普願獨超物外僧問南泉道三世諸佛不知有狸奴白牯却知有爲甚麼三世諸佛不知有泉云未入鹿苑時猶較些子僧云狸奴白牯爲甚麼却知有泉云汝爭怪得伊

臨濟上堂云一人在孤峰頂上無出身之路一人在

十字街頭亦無向背那箇在前那箇在後不作維摩詰不作傅大士珍重

風穴和尚因僧問語默涉離微如何通不犯穴云長憶江南三月裡鷓鴣啼處百花香

仰山和尚夢見往彌勒處安第二座有一尊者白槌云今日當第二座說法乃起白槌云摩訶衍法離四句絕百非諦當諦當

六祖大師因風颺刹幡有二僧對論一僧云幡動一僧曰風動往復曾未契理祖云不是風動不是幡動仁者心動二僧悚然

五祖演因僧問如何是臨濟下事演云五逆聞雷如何是雲門下曰紅旗閃爍如何是曹洞下曰馳書不到家如何是滙仰下曰斷碑橫古路如何是法眼下曰巡人犯夜

會元第三云龐居士問靈照女云古人曰明明百少頭明明祖師意汝如何會女云老老大大莫作這箇說話士曰汝又作麼生云明明百少頭明明祖師意士咲之

于頔公問龐居士疾次士謂之曰但願空諸所有慎無實諸所無好住世間皆如影響

虛堂因僧問文殊是七佛之師因甚出女子定不得師云家鬼作崇僧云罔明是下方聲聞因甚却出得師云半幅全封

雲門上堂云作麼生是聞聲悟道見色明心舉起曰觀音菩薩將錢來買餠餅放下手曰元來祇是饅頭

教中說妙峰孤頂德雲比丘從來不下山善財去參七日不逢一日却在別峰相見及乎見了却與他說一念三世一切諸佛智慧光明普光法門圓悟云德雲既不下山因什麼却在別峰相見若道他

下山教中說德雲比丘從來不曾下山常在妙峰
孤頂到這裡德雲與善財的的在那裡

趙州諗禪師問南泉曰知有底人向甚處去泉云山
前檀越家作一頭水牯牛去州云謝師指示泉云
昨夜三更月到窓

雲門三句 函蓋乾坤 截斷衆流 隨波逐浪

徑山大慧杲禪師一日聞圓悟陞堂舉僧問雲門如
何是諸佛出身處門曰東山水上行天寧卽不然
忽有人問如何是諸佛出身所只向他道薰風自
南來殿閣生微涼大慧言下便悟去

洪州百丈山涅槃和尚一日謂僧云汝與我開田了
我爲汝說大義僧開田了歸請師說大義師乃展
開兩手

華嚴曰心如工畫師作種種五陰一切世間中莫不
從心造

運菴反松源衣之頌曰老巖不負靈山託颺下金欄
如弊屣

圓悟禪師讚六祖云稽首曹溪真古佛八十生爲善
知識

一子出家九族生天目蓮母因甚墮地獄